



Bina sahsiah menerusi aktiviti di universiti

Maasiswa ialah pemacu utama dalam pembangunan negara, tidak kira pada masa kini atau masa akan datang. Tidak dapat dinafikan pada ketika ini, wujud pergolakan dalam politik negara.

Apa yang menjadi hasrat kita semua ialah akan muncul pemangku kepemimpinan yang berwibawa dalam kalangan mahasiswa universiti tempatan.

Namun, bagaimanakah munculnya pemimpin dalam kalangan mahasiswa jika masa dan tenaga sering kali dikatakan hanya untuk waktu belajar sahaja.

Memegang jawatan sebagai Timbalan Naib Yang Dipertua Pembangunan Sahsiah Pelajar antara tanggungjawab paling besar pernah saya peroleh.

Mengimbau kembali saat dilantik, jujur, ada beberapa pihak yang kurang yakin dengan kredibiliti saya untuk memegang amanah itu.

Setelah belajar daripada pengalaman, cara untuk menyakinkan orang adalah dengan tindakan dan bukan kata-kata. Jadi perkara yang mampu

dilakukan ialah menjalankan tanggungjawab selagi diperlukan.

Sehubungan dengan itu, segala yang diberikan haruslah seiring dengan keikhlasan tanpa mengharapkan balasan. Hal ini kerana, melalui itulah hasil kerja tangan kita dapat dizahirkan dengan sebaiknya.

Walaupun adakala kita gagal dalam mencapai sesuatu peringkat atau keputusan yang diharapkan, pengalaman itulah antara perkara perlu dianggap pencapaian terbesar kita.

Pemimpin harapan

Setelah beberapa bulan membantu dalam menjalankan program pada peringkat kolej mahupun fakulti, pihak universiti memberikan penghargaan Anugerah Pemimpin Harapan dalam majlis anugerah kecemerlangan pelajar.

Namun, saya menganggap anugerah ini semestinya

bukan sesuatu yang layak digembar-gemburkan, sekadar ingin berkongsi agar mahasiswa sedar supaya sentiasa berusaha keras untuk mampu berdiri di khalayak ramai dan

memimpin.

Memegang portfolio yang memerlukan saya memantau ketiga-tiga bahagian yang tidak asing dalam universiti iaitu kerohanian, sukan dan kebudayaan, ialah sesuatu yang sukar bagi saya terutama dalam memantapkan sahsiah pelajar.

Kejayaan tidak akan dapat dicapai dalam masa singkat, namun apa yang mampu diusahakan ialah untuk sentiasa menyertai aktiviti yang sihat supaya menjadi contoh kepada yang lain.

Gerak kerja yang dijalankan ialah memberikan sokongan dan liputan aktiviti mahasiswa supaya ramai lagi mahasiswa lain turut berminat dan menyertai mereka.

Secara tidak langsung, mahasiswa dapat membentuk sahsiah mereka dengan aktiviti yang dijalankan di universiti masing-masing seperti ceramah, sukan dan persempahan kebudayaan.

Hal ini sering dilihat sebagai perkara yang remeh, tetapi apabila diperhalusi dengan teliti, antara perkara yang diperoleh ialah kemahiran bekerja dalam kumpulan dan



Pembabitan pelajar dalam pengurusan program atau menjadi peserta dalam sesuatu aktiviti sedikit sebanyak mampu mengasah bakat kemahiran insaniah.

(GAMBAR HIASAN).

kaedah komunikasi yang berkesan dalam menyampaikan maklumat.

Dalam erti kata lain, pembabitan dalam pengurusan program atau menjadi peserta dalam sesuatu aktiviti sedikit sebanyak mampu mengasah bakat kemahiran insaniah.

Prestasi akademik

Saya juga yakin, mahasiswa kini sedar bahawa keputusan peperiksaan akhir tahun yang cemerlang tidak mampu menjanjikan peluang kerjaya apabila mereka tamat belajar, justeru saya sarankan agar mereka terus bergiat aktif di universiti di samping menjaga prestasi akademik.

Selain itu, dalam usaha menjadi mahasiswa yang memiliki sahsiah mantap, kita perlu

sentiasa banyak membaca dan menambah ilmu pengetahuan.

Hal ini kerana pendapat mahasiswa penting, tetapi saya sering melihat mahasiswa banyak mengeluarkan pendapat mereka tanpa usul periksa dan pengetahuan yang dalam.

Perkara ini bukan sahaja mengaibkan diri mereka sendiri di laman sosial seperti 'Facebook' atau 'Twitter', malah dalam setengah perkara boleh menimbulkan perkara yang tidak diingini seperti fitnah, salah maklumat dan fahaman terpesong termasuk dalam bidang agama dan politik.

Pendapat mahasiswa amat diraikan oleh orang ramai

namun penting pendapat itu didasari dengan fakta, mampat dengan ilmu yang jelas dan sahih.

Perkara yang jelas dapat dilihat ialah mahasiswa tungggak utama dalam pembentukan masyarakat yang akan datang.

Diharapkan barisan mahasiswa yang lengkap dengan ciri kepemimpinan mampu menaikkan taraf pemikiran Malaysia kepada minda kelas pertama di samping membentuk modal insan yang terbilang menuju ke arah wawasan 2020.

Seperti kata John C. Maxwell; "A leader is one who knows the way, goes the way and shows the way."

Mahasiswa yang berminat untuk menghantar rencana, boleh e-mel ke bhvarsiti@bh.com.my